

# **Reglur um ábyrgðarmörk og starfshætti stjórnenda, kjörinna fulltrúa og nefndarmanna í stjórnsýslu Fljótsdalshéraðs**

## **I.**

### **Um ábyrgðarmörk stjórnenda, kjörinna fulltrúa og nefndarmanna hjá Fljótsdalshéraði**

#### **1.**

Kjörnir fulltrúar eru bæjarfulltrúar og varamenn þeirra. Nefndarmenn eru þeir einstaklingar sem tilnefndir eru í fagnefndir sveitarfélagsins og starfa í umboði bæjarstjórnar.

Kjörnir fulltrúar og nefndarmenn starfa samkvæmt:

- a. Samþykkt um stjórn Fljótsdalshéraðs og fundarsköp bæjarstjórnar,
- b. sveitarstjórnarlögum nr. 45/1998,
- c. samþykktum um fastanefndir,
- d. Stefnu Fljótsdalshéraðs og sérstökum stefnumarkandi samþykktum bæjarstjórnar,
- e. ákvörðunum, áætlunum og útgjaldarömmum sem bæjarstjórn samþykkir,
- f. reglum þessum og
- g. lögum og reglum sem gilda um einstaka málaflokka.

#### **2.**

Stjórnendur eru allir yfirmenn samkvæmt gildandi skipuriti Fljótsdalshéraðs á hverjum tíma.

Stjórnendur starfa samkvæmt:

- a. Samþykkt um stjórn Fljótsdalshéraðs og fundarsköp bæjarstjórnar,
- b. sveitarstjórnarlögum nr. 45/1998,
- c. samþykktum um fastanefndir bæjarstjórnar,
- d. Stefnu Fljótsdalshéraðs og sérstökum stefnumarkandi samþykktum bæjarstjórnar,
- e. ákvörðunum, áætlunum og útgjaldarömmum sem bæjarstjórn samþykkir,
- f. gildandi kjarasamningum og samningum um ráðningarkjör,
- g. reglum þessum og
- h. lögum og reglum sem gilda um málaflokk þeirra eða verkefni.

#### **3.**

Það er hlutverk kjörinna fulltrúa að

- a. móta stefnu fyrir starfsemi Fljótsdalshéraðs og einstakra deilda og stofnana sveitarfélagsins, m.a. með gerð starfs- og fjárhagsáætlana,
- b. setja starfsemi sveitarfélagsins reglur, m.a. um ábyrgðarmörk og starfshætti nefnda, kjörinna fulltrúa og embættismanna, gjaldskrár o.þ.h. eftir því sem lög mæla fyrir um og þörf krefur,
- c. ákveða stjórnskipan sveitarfélagsins og ráða yfirmenn stjórnsýslunnar skv. 60. og 62. gr. Samþykktar um stjórn Fljótsdalshéraðs og fundarsköp bæjarstjórnar.

#### **4.**

Það er hlutverk kjörinna fulltrúa og nefndarmanna að hafa eftirlit með samþykktum og ákvörðunum bæjarstjórnar og nefnda og að starfsemi sé samkvæmt lögum og samþykktum reglum.

5.

Bæjarstjóri og embættismenn eru tengiliðir kjörinna fulltrúa við daglega starfsemi Fljótsdalshéraðs og bera ábyrgð á að hún sé samkvæmt stefnu og ákvörðunum í viðkomandi málaflokki. Kjörnir fulltrúar og nefndarmenn hlutast aðeins til um framkvæmd stefnu með samþykktum í bæjarstjórn og á nefndafundum en hafa sem einstaklingar ekki boðvald yfir starfsmönnum sveitarfélagsins.

6.

Bæjarstjórn er heimilt að fela nefndum fullnaðarafgreiðslu mála skv. 53. grein Samþykktar um stjórn Fljótsdalshéraðs og fundarsköp bæjarstjórnar. Á sama hátt skv. 54. gr. sömu samþykktar geta nefndir falið stjórnendum fullnaðarafgreiðslu mála á verksviði þeirra samkvæmt starfsreglum sem bæjarstjórn staðfestir. Stjórnendur gera nefndum reglulega grein fyrir afgreiðslu slíkra mála.

7.

Bæjarstjóri kynnir og er í forsvari fyrir ákvarðanir og stefnumörkun bæjarstjórnar en formenn nefnda og ráða kynna ákvarðanir þeirra. Stjórnendur kynna og eru í forsvari fyrir framkvæmd þessara samþykktar og ákvarðana.

## II.

### Um skyldur og starfshætti stjórnenda

8.

Stjórnendum Fljótsdalshéraðs ber að hafa hagsmuni heildarinnar að leiðarljósi og taka þá fram yfir hagsmuni stjórnunareiningar sinnar ef svo ber undir. Þeim ber einnig að hafa að leiðarljósi þá skilgreiningu á „Hlutverki stjórnanda hjá Fljótsdalshéraði“ sem í gildi er á hverjum tíma skv. samþykkt bæjarráðs.

9.

Stjórnandi

- a. er leiðtogi undirmanna sinna í þeirri viðleitni að veita sem besta þjónustu við íbúa sveitarfélagsins samkvæmt stefnu bæjarstjórnar. Hann hefur samráð við undirmenn sína um framkvæmd stefnunnar en þeir taka þátt í mikilvægum ákvörðunum sem varða starfsvettvang þeirra,
- b. ákveður samskiptareglur þeirra deilda eða stofnana sem heyra beint undir hann. Stjórnandi getur ekki sett starfsreglur sem hafa áhrif á verksvið annarra hliðstæðra stjórnenda nema í samráði við þá og sameiginlegan yfirmann,
- c. samræmir störf milli deilda eða stofnana sem undir hann heyra,
- d. færir útgjöld milli rekstrarliða innan málaflokksins/verkefnisins að frátöldum liðum sem bundnir eru af lögum, reglugerðum og samþykktum,
- e. ákveður tilhögun starfsmannahalds, m.a. ráðningar almennra starfsmanna og tilfærslu þeirra milli starfa samkvæmt ráðningarsamningum, kjarasamningum og gildandi reglum bæjarstjórnar. Stjórnandi auglýsir störf og gefur upplýsingar um þau,
- f. ber ábyrgð á innkaupum deildar og stofnunar sem undir hann heyrir í samræmi við stefnu og reglur Fljótsdalshéraðs í innkaupamálum. Stjórnanda er heimilt, í samráði við viðkomandi deildarstjóra, að gera minni háttar samninga til allt að þriggja ára ef þeir hafa ekki í för með sér aukningu á árlegum útgjöldum málaflokksins eða breytingar á þjónustunni sem veitt er,

- g. hefur eftirlit með daglegri starfsemi deilda og stofnana sem undir aðra stjórnendur heyrir, sem lægra eru settir í skipuriti, en hlutast ekki til um hana nema um frávik sé að ræða frá vönduðum stjórnsýsluháttum, samþykktum starfs- og fjárhagsáætlunum eða reglum og samþykktum bæjarstjórnar eða fagnefndar.

10.

Stjórnandi ber ábyrgð gagnvart næsta stjórnanda ofar í skipuriti og lýtur fyrirmælum hans.

11.

Verði stjórnandi var við óeðlileg frávik frá markaðri stefnu, settum reglum eða samþykktum starfs- og fjárhagsáætlunum í rekstri stjórnunareininga sem undir hann heyra, beinir hann fyrirmælum um úrbætur til næsta undirmanns sem ber ábyrgð á viðkomandi málaflokki eða verkefni.

12.

Stjórnanda er óheimilt að semja um ráðningarkjör umfram kjarasamninga (hlunnindi, fastar yfirvinnugreiðslur o.s.frv.) eða samþykktir bæjarráðs. Stjórnandi gerir ráðningarsamninga að höfðu samráði við næsta yfirmann.

Samþykkt í bæjarráði 10. mars 2010

Samþykkt í bæjarstjórn 17. mars 2010